

**Акафист**  
**святителю Митрофану,**  
**епископу Воронежскому**

*Празднование 1 августа (19 июля), 20 (7) августа,  
17 (4) сентября, 6 декабря (23 ноября)*

***Кондак 1***

Избранный чудотворче и изрядный угодниче Христов, многоцелебный источниче и молитвенниче о душах наших, святителю отче Митрофане, яко имеяй дерзновение ко Господу, от всяких нас бед свободи зовущих:

Радуйся, Митрофане, великий и преславный чудотворче.

***Икос 1***

Ангел земный и человек небесный был еси, святителю отче Митрофане: вперив бо ум в божественная, временная и земная пренебрегл еси, темже и вселися в тя Пресвятыи Дух, Егоже благодатию светло украшен еси. Сего ради тебе, на небеси и на земли прославленному, вопием сице:

Радуйся, яко чистотою и святынею Ангелом уподобился еси; радуйся, яко постом и бдением безстрастия достигл еси. Радуйся, светильниче божественнаго света; радуйся, молитв благовонное кадило. Радуйся, верных непреложное утверждение; радуйся, неверных богомудренное обличение. Радуйся, христиан непостыдное прибежище; радуйся, благочестия стено неборимая. Радуйся, крепкое кормило Церкви Христовы; радуйся, непоколебимый

столпе Православия. Радуйся, апостольских преданий верный хранителю; радуйся, таин Божиих истинный строителю.

Радуйся, Митрофане, великий и преславный чудотворче.

### *Кондак 2*

Видяще от святых мощей твоих приснотекущий источник исцелений, благоговения и радости исполнени, благодарим Бога, дивно прославляющего святых Своя, вопиюще Ему: Аллилуия.

### *Икос 2*

Разумом, просвещенным свыше, вразумляя заблуждших, поборник был еси истинных Христовы Церкви, егда в царствующем граде Москве суемудреннии лжеучителие на соборе святительском отверзоша нечестивая уста своя на ея хуление. Мы же от мысленных волков избавльшися, верно взываем ти:

Радуйся, цевнице Духа Святаго, бряцающая славу Божию во спасение человеком; радуйся, громе, сокрушай еретическое злочестие. Радуйся, молние, попадающая плевелы неверия; радуйся, ясное зеркало апостольских преданий. Радуйся, немолчный благовестниче велений Христовых; радуйся, верный наставниче богомудрия. Радуйся, монашествующих славо; радуйся, архиереев божественное удобрение. Радуйся, златозарное светило, просвещающее землю Русскую; радуйся, надежный ходатаю нам царствия небеснаго. Радуйся, яко твоим к Богу молением от ада свободждаем; радуйся, яко твоим

предстательством райския жизни сподобляемся.

Радуйся, Митрофане, великий и преславный чудотворче.

### ***Кондак 3***

Силе Вышняго чудодействующей, никтоже притекаяй к тебе, преблаженне отче, отходит тощ: недугующим бо явился еси исцеление, слепым прозрение, хромым утверждение, и вси благовернии людие, скорого тя помощника стяжавше, радостно Богу воспевают: Аллилуия.

### ***Икос 3***

Имеяй в сердце своем огонь любви божественныя, спасения ради душ человеческих пастырски подвижался еси, богомудре, противу козней диавольских и победительным оружием креста отсекал еси сети лукаваго, яко паучину. Темже приими от нас песнь сию:

Радуйся, рабе Божий, благий и верный; радуйся, достойный делателю вертограда Христова. Радуйся, учителю смирения и целомудрия; радуйся, образе кротости и послушания. Радуйся, мужу желаний; радуйся, Проповедниче чудес Божиих. Радуйся, наставниче дел добрых; радуйся, твердое ограждение Христовы Церкви. Радуйся, огневидный столпе, наставляяй на путь спасения; радуйся, светозарный светильниче, верныя просвещаяй. Радуйся, неизчерпаемый сосуде благодати Христовы; радуйся, чистое приятище Духа Святаго.

Радуйся, Митрофане, великий и преславный чудотворче.

## *Кондак 4*

Бурю мирскаго жития и тяжелоносныя страстей волны прешед, обрел еси тихое пристанище и, в пустыню вселився, неленостно работал еси Христу во мнозе долготерпении. Отнюдуже руководил еси в Царствие Божие и духовная чада своя, научив их едиными усты и единым сердцем пети Богу: Аллилуия.

## *Икос 4*

Слышаще дивныя о Бозе труды твоя, святителю отче Митрофане, прихождаху к тебе издалеча жаждаущии глаголов живота вечнаго: понеже ты учил и творил еси, наставляял словом и житием своим. Сего ради любовью вопием ти:

Радуйся, апостолов преемниче; радуйся, святителей сопрестольниче. Радуйся, преподобных собеседниче; радуйся, праведных украшение. Радуйся, венче воздержания; радуйся, благосеннолиственное древо, потоками райскими воспитанное. Радуйся, беспомощных спасительное призрение; радуйся, цвете нетления. Радуйся, яко отчуждением временных благ стяжал еси блаженство нищеты духовныя; радуйся, яко самовольным обнищанием обрел еси сокровище благ вечных. Радуйся, яко во глубину смирения приникл еси; радуйся, яко на высоту бесстрастия возшел еси.

Радуйся, Митрофане, великий и преславный чудотворче.

## *Кондак 5*

Боготечней звезде, путеводившей древле волхвов к Праведному Солнцу, подобен был еси, всехвальне отче, сам восходя благодатию Божию от силы в силу, и приводя с собою ко Христу Богу всех ищущих спасения. Темже и мы, немерцающим сиянием славы твоя озаряеми, согласно вопием Ему: Аллилуия.

## *Икос 5*

Видевше в тебе воронежстии людие перваго архипастыря, яко Ангела, знамение небесныя благодати носяща, возрадовашася радостью неизглаголанною: ты же, добре внимая себе и всему стаду, в немже тя Дух Святой постави епископа, пасл еси усердно Церковь Господа и Бога, яко слово воздати хотя. Сего ради ублажаем тя, отче Митрофане, зовуще:

Радуйся, человеце Божий, преподобием, аки поясом златым, препоясанный; радуйся, друже Христов, святительством, аки бисером драгим, преукрашенный. Радуйся, воине Христов непобедимый; радуйся, страже дома Божия неусыпный. Радуйся, восхождения в сердце своем к Небеси положивый; радуйся, словесныя овцы Христовы на живоносных пажитях воспитавый. Радуйся, яко не попустил еси душетленному зверю расхитити стадо твое; радуйся, яко от Небеснаго Пастыреначальника праведное воздаяние приял еси. Радуйся, возлюбивый благолепие дому Божия; радуйся, в самом себе храм Триипостасному Божеству уготовавый. Радуйся, яко во умерщвленном телеси

ризою нетления одеян еси; радуйся, яко из гроба зарею бессмертия нас осияваеши.

Радуйся, Митрофане, великий и преславный чудотворче.

### ***Кондак 6***

Словес евангельских, еже не скривати себе сокровища на земли, верный блюститель показался еси, всеблаженне Митрофане, егда достояние свое мудре расточил еси, снабдевая убогих и пособствуя благоверному императору Петру в сооружении кораблей на побеждение неверных агарян, не ведущих пети: Аллилуия.

### ***Икос 6***

Возсия царству православному благотворный свет великих добродетелей твоих, святителю отче Митрофане, о нихже благодаряще Отца Небеснаго, к тебе яко к присному о нас молитвеннику, взываем сице:

Радуйся, наставниче целомудрия; радуйся, смирения Христова истинный подражателю. Радуйся, алтаря Господня благоговейный служителю; радуйся, святителей украшение. Радуйся, иноческаго равноангельнаго жития ревнителю; радуйся, безмолвия древних богоносных отец подражателю. Радуйся, милости струе неизсякаемая; радуйся, благоутробия хранилище неоскудное. Радуйся, сирых благонадежное пристанище; радуйся, вдовиц скорое заступление. Радуйся, множество душ уневестивый Христу; радуйся, купно с ними пребываяй в радости Господа твоего.

Радуйся, Митрофане, великий и преславный чудотворче.

### *Кондак 7*

Хотящу некогда благоверному императору Петру беседовати с тобою, призван был еси во двор царский: егда же внезапно узрел окрест его изваяния языческая, абие возвратился еси вспять, не убоясь прещения царева, и готов был еси душу свою положити паче, неже растлити мысленныя очи сердца своего неподобным видением, научая верных единому живому Богу пети: Аллилуия.

### *Икос 7*

Новаго тя по благочестии ревнителя познав благоверный царь и видя небоязненное твое на смерть изволение, повеле суетная изваяния низринуть. Мы же святому дерзновению твоему чудящися, вопием:

Радуйся, непреклонный исповедниче Православия; радуйся, ревностный защитниче благочестия. Радуйся, священнотаинниче благодати; радуйся, велегласный проповедниче покаяния. Радуйся, апостолов немолчная уста; радуйся, Церкви непоколебимый столпе. Радуйся, пастырю добрый; радуйся, яко непричастен явился еси лицепрятию. Радуйся, яко истину не обинуяся свидетельствовал еси; радуйся, яко твоим пособием сокрушаются козни вражия. Радуйся, яко всем верным воспоминание твое пресладко; радуйся, яко всей Церкви Христовой имя твое пречестно.

Радуйся, Митрофане, великий и преславный

чудотворче.

### *Кондак 8*

Странное и преславное чудо благодати небесная является ныне во очию всех верных: долготерпеливый и многомилостивый Господь не прогневался на ны до конца за беззакония наша, но, помянув щедроты Своя, дарова нам тебе, досточудне отче, заступника изрядна, тако вознесе рог спасения нашего, да выну поем Ему: Аллилуия.

### *Икос 8*

Весь еси в вышних, но и нижних не оставляеши, святителю отче Митрофане, присно со Христом царствуеши, и о нас грешных молитвы к Нему возсылаеши: не точию бо припадающих к цельбоносным мощам твоим, но и далече отстоящих, призывающих же всечестное имя твое, предстательством твоим соблюдаеши от всякаго зла. Темже во умилении зовем ти:

Радуйся, прибежище наше во всех скорбех; радуйся, скорый помощниче всех в бедах сущих. Радуйся, целителю болезней душевных вкупе и телесных; радуйся, на невидимые враги наша сильный поборниче. Радуйся, посетителю в немощи лежащих; радуйся, утешителю в бедах сущих. Радуйся, яко тобою престаёт рыдание; радуйся, яко тобою подается радость. Радуйся, яко Христу доблественно последовал еси; радуйся, яко Сладчайшему Иисусу до конца послужил еси. Радуйся, яко наслаждаеши лицезрения Божия; радуйся, яко сподобился еси зрети невечерний день царствия Его.



Радуйся, Митрофане, великий и преславный чудотворче.

### *Кондак 9*

Всякия скорби и труды доблественно претерпел еси, шествуя по пути спасения до маститыя старости, облечен во всеоружие Божие, во плоти аки безплотен, умерщвляя страсти и сокрушая наветы миродержителя тьмы века сего. Темже небесным соприсчислен силам, купно с ними воспеваваеши Богу: Аллилуия.

### *Икос 9*

Ветии многовещаннии недоумеют изобразити обилия любве твоея, еюже, отходя к Творцу, преисполнен был еси к чадом твоим о Господе: восхотев бо и по отшествии своем присно поучати их, яко живой, завещал еси им вся потребная ко спасению. Сего ради из глубины сердец вопием ти:

Радуйся, благочестно течение скончавый; радуйся, веру соблюдый всецелу. Радуйся, оружием благоволения Божия венчанный на земли; радуйся, венцем нетления украшенный на Небеси. Радуйся, долу величием чудес блистающий; радуйся, горе лучами Трисолнечнаго Света осияваемый. Радуйся, яко в пресветлых райских обителях вселяешия. Радуйся, яко лицом к лицу Божественнаго света причащаешия. Радуйся, яко с небесных высот на мольбы наша призираеши; радуйся, яко в сонях и видениях во благо нам являешия. Радуйся, яко молитвами твоими от вечныя смерти свободждаемя; радуйся, яко предстательством твоим безконечныя

жизни сподобляемся.

Радуйся, Митрофане, великий и преславный чудотворче.

### *Кондак 10*

Иже всем человеком хотяй спастися и в разум истины приити, Господь и Бог наш Иисус Христос явил нам нетленное тело твое на земли, яко живоносную купель, врачующую всяку болезнь и всяку язю в людех. Темже благодарственно вопием Ему: Аллилуия.

### *Икос 10*

Стена еси спасения прибегающим к тебе, святителю Митрофане, и в бываемых от тебе знамениях, исповедающих величие Божие. Сего ради, ущедрени твоим чудодейственным о нас ко Христу Богу ходатайством, вопием ти:

Радуйся, царей благочестивых поборниче; радуйся, архиереев православных укрепление. Радуйся, царства православнаго защитниче; радуйся. Церкви святей утверждение. Радуйся, прежде смерти умертвивый плоть свою; радуйся, предвкусивый жизнь вечную, прежде внития в селения райская. Радуйся, умерый миру прежде кончины твоея; радуйся, воскресый духом во Христе, прежде успения твоего. Радуйся, яко от обители земныя во обитель небесную преселился еси; радуйся, яко от обители небесныя во обители земныя благодворя нисходиши. Радуйся, яко и по отшествии твоём с нами пребываеши. Радуйся, яко и по умертвии твоём умерщвленныя грехми души молитвами твоими

оживляеши.

Радуйся, Митрофане, великий и преславный чудотворче.

### *Кондак 11*

Пение, приносимое ныне, аще бы и превыше человеческого было, не довлекло бы к славословию Бога, даровавшего тебе благодать исцелений. Сего ради недоумеюще благохвалити его по достоянию, смиренномудренно вопием: Аллилуия.

### *Икос 11*

Светоподательна светильника, просвещающего души наша верою, видим тебе, преблаженне отче, пред престолом Божиим стояща, и твоим блистанием озаряеми, зовем ти таковая:

Радуйся, пастырю предивный; радуйся, учителю премудрый. Радуйся, столпе веры непоколебимый; радуйся, насадителю благих. Радуйся, чистоты селение; радуйся, печальных утешение. Радуйся, сырых питателю; радуйся, обидимых предстателю. Радуйся, премудрости Божия приятелище; радуйся, источниче неизчерпаемая благодати исцелений. Радуйся, провозвестниче Божественных велений; радуйся, сокровище милосердия Божия неистощаемое.

Радуйся, Митрофане, великий и преславный чудотворче.

### *Кондак 12*

Благодать, свыше ти данную познавше, благоговейно лобызаем святолепное изображение всечестнаго лица твоего, еже благоволил еси дивно

явити нам. Темже благодарственно вопием Христу Богу нашему: Аллилуия.

## *Икос 12*

Поюще твое к Богу отшествие, святителю Митрофане, почитаем священную память твою, величаем ревность по Бозе, хвалим долготерпение, славим незлобие, и ублажаем кончину твою: на смертном бо одре возлежа, желанием возжелал облещися в великий ангельский образ, наречен был Макарием, блаженства тезоименитым, блажен быв воистинну, яко царствие небесное наследовал еси. Темже молящися усердно, о еже сподобитися и нам неосужденно предстати на Страшное судище Христово, взываем ти:

Радуйся, у престола Божия теплый о нас предстателю; радуйся, мужу желаний, прославивший Бога в телеси и в души своей. Радуйся, добропобедный воине Царя Небеснаго; радуйся, вождю премудрый ратующим противу сил адовых. Радуйся, яко с горящим светильником сретил еси Христа; радуйся, яко от Него благодать исцелений приял еси. Радуйся, яко благоволением Пресвятыя Богородицы возвеличен еси; радуйся, яко во светлостех святых пребываеши. Радуйся, яко со пророки и апостолы ликовствуеши; радуйся, яко со святители и мученики прославлен еси. Радуйся, яко с преподобными и праведными веселишися; радуйся, яко со всеми избранными Божиими присно торжествуеши.

Радуйся, Митрофане, великий и преславный

чудотворче.

### ***Кондак 13***

О великий и пречудный отче Митрофане, прими благоутробно сие малое моление наше, и твоим благоприятным ходатайством избави нас от всех враг видимых и невидимых, от всякия напасти и скорби, от напрасныя смерти и будущия муки, да сподобимся с тобою и со всеми святыми во веки воспевати Богу Спасителю нашему: Аллилуия.

*(Этот кондак читается трижды, затем икос 1 и кондак 1)*

### ***Икос 1***

Ангел земный и человек небесный был еси, святителю отче Митрофане: вперив бо ум в божественная, временная и земная пренебрегл еси, темже и вселися в тя Пресвятыи Дух, Егоже благодатию светло украшен еси. Сего ради тебе, на небеси и на земли прославленному, вопием сице:

Радуйся, яко чистотою и святынею Ангелом уподобился еси; радуйся, яко постом и бдением безстрастия достигл еси. Радуйся, светильниче божественнаго света; радуйся, молитв благовонное кадило. Радуйся, верных непреложное утверждение; радуйся, неверных богомудренное обличение. Радуйся, христиан непостыдное прибежище; радуйся, благочестия стено неборимая. Радуйся, крепкое кормило Церкви Христовы; радуйся, непоколебимый столпе Православия. Радуйся, апостольских преданий верный хранителю; радуйся, таин Божиих истинный строителю.

Радуйся, Митрофане, великий и преславный

чудотворче.

### *Кондак 1*

Избранный чудотворче и изрядный угодниче Христов, многоцелебный источниче и молитвенниче о душах наших, святителю отче Митрофане, яко имеяй дерзновение ко Господу, от всяких нас бед свободи зовущих:

Радуйся, Митрофане, великий и преславный чудотворче.

### *Молитва первая*

О святителю отче Митрофане, се мы грешнии, нетлением честных мощей твоих и многими благодеяньми, чудесно содеянными и содеваемыми тобою, уверившися, исповедуем, яко имаши велию благодать у Господа Бога нашего, и всемирно ко твоему благосердию припадающе, тебе молимся сице: моли о нас Христа Бога нашего, да низпослет всем чтущим святую память твою и усердно к тебе прибегающим богатыя милости Своя; да утвердит во святей Своей Православной Церкви живой дух правыя веры и благочестия, дух ведения и любви, дух мира и радости о Дусе Святе, да вся чада ея, чиста суща от мирских искушений и плотских похотей и злаго действия злых духов, духом и истиною поклоняются Ему, и усердно о соблюдении заповедей Его ко спасению душ своих да потщатся. Пастырем ея да даст Господь святую ревность попечения о спасении людей, во еже неверующия просветити, неведущия наставить, сомнящияся вразумити, отпадшия от Православныя Церкви к ней возвратити,

верующия в вере соблюсти, грешныя на покаяние подвигнуть, кающияся утешити и во исправлении жизни утвердити, и тако вся люди ко уготованному вечному Царству святых Его привести. Умоли Господа, угодниче Христов: верных рабов Его, в скорби и печали день и ночь вопиющих к Нему, многоболезненный вопль да услышит и да изведет от погибели живот наш. Всем же в державе людем да дарует благий Бог наш мир, тишину, безмятежие и изобилие плодов земных, паче же ко исполнению заповедей Его тщание неленостное; и да избавит царствующия грады, град сей и вся иныя грады и веси, от глада, труса, потопа, огня, меча, нашествия иноплеменных, междоусобных брани, смертоносных язвы и от всякаго зла. Ей, святителю Божий, да устроиши молитвами твоими вся благая душам и телесем нашим; да и мы прославим в душах и телесех наших Господа и Бога нашего, Иисуса Христа, Емуже со Отцем и Святым Духом слава и держава во веки веков. Аминь.

### ***Молитва вторая***

О святителю отче Митрофане! Приими сие малое моление от нас, грешных раб Божиих (*имена*), к тебе прибегающих, и теплым твоим предстательством умоли Господа и Бога нашего, Иисуса Христа, яко да подаст нам согрешений наших прощение и избавит нас от бед, печалей, скорби и болезней душевных и телесных, обдержажих нас; да подаст вся на пользу настоящаго жития нашего потребная; да дарует нам скончати житие сие привременное в покаянии и да

сподобит нас, грешных и недостойных, небеснаго царствия Своего, во еже со всеми святыми славити Его безконечное милосердие, со Безначальным Его Отцем и Святым и Животворящим Его Духом, во веки веков.